

1938

Fasnacht 2013



DIE ABVERHEYTE

75 JOHR

Sujet:

FRAU WILL AU

Vor fünfesibzig Johr sait 's Lotti
Zer Ruth: «Am Cortège pfyffe wott y!»
Und d' Iren schimpft: «Ych bi am Koche!
Si hänn ys doch ganz fescht versproche,
Dass mir am Cortège dörfe starte.
Jetzt löhn si ys im Rääge warte.
Zwor, Pfyffe hämmer dörfe lehre,
Doch 's Ystoh dien si ys verwehre.
Si wänn ihr Wort jetzt nümme halte
Uus Angscht es könnti d' Clique spalte.
Si haige halt kai anderi Wahl.
E Frau wo mitpfyfft – e Skandall!»

«Mir löhn ys nit in d' Pfanne haue,
Jetzt göhmer halt ellai, mir Fraue!»
- E guete-n-Yfall und e gscheyte:
D' Geburtsstund vo de-n-Abverheyte!
D' Geburt isch schwär gsi, sälle Jänner,
Am Aafang gohts nit ohni Männer,
Doch schliesslig wird uus däre Druppe
E-n-exklusivi Frauegruppe.
Die Süüchi het rasch um sich griffe,
Denn meh und meh hänn Fraue pfiffe.
Und gly hänn d' Buebe-n-afoh brummle:
«'S isch Wybersach - mir lehre drumml!»

Für d' Männerclique wird's bald schwäär.
Wo nämme si jetzt d' Pfyffer häär?
Dr Uuswääg haisst in mänggem Stamm:
«Soyez les bienvenues, mesdames!»
Es isch harte Gschlächterkampf.
Und d' Fraue mache wytter Dampf.
Si wänn bigoscht nit numme pfyffe,
Si dien au zue de Schleegel gryffe.
Mir frooge-n-ys jetzt konschterniert,
Wo das am Änd no aanefiehrt.
Duet d' Fasnacht uus em Glychgwicht groote?
Und bruucht's emänd e Männerquote?

Vyl Wasser isch dr Rhy ab gflosse
Syt die drey Maitli hänn beschlosse,
Si liesse sich nit unterdrugge
Und welle nümme-n-Alles schlugge,
Und wenn's dr Männerwält nit bass,
Denn gienge si ellai uff d' Gass.
Wenn mir hütt dörfe jubiliere.
Und d' Piccolo dien tiriliere,
Verdangge mir das ihrem Muet.
Die Abverheyte ziehn dr Huet.
Mir wäre-n-ohni sii hütt nit
Uff unserem Jubileumsritt.

Zwor dien mir nümme z'vorderscht rytte,
Wie in de wilde-n-Aafangszytte,
Sinn nüm so flotti Amazone.
Jetzt hängge mir an Traditione.
'S git Stimme wo-n-ys kritisiere:
Mr sotte-n-ys modärnisiere
Und d' Gschlächtertrenng überwinde.
Mir Abverheyte-n-aber finde:
Mir nämme kaini Männer uff,
Wenn's euch nit basst, mir pfyffe druff!
Solang's no Männerclique git,
Mutiere *mir* d' Statute nit.

D Ladäärne-Uusstellig uff em Minschterplatz und d Waage- und
Reggwisyte-Uusstellig bi dr Kasäärne sin vom Määntig znacht
bis am Mittwuch demoorge (18. bis 20. Hornig). Deert und an
de 3 Verkaufsständ (CINS) in der Stadt ka men au alli Zeedel
und Schnitzelbängg, d Blaggedde und dr Rädäbäng kaufe.